

UMP Advanced tawar ijazah sarjana muda sepenuh masa

→ Tawaran sesi kemasukan khas pengambilan Februari 2018

Oleh Shahrinnahar Latib
bhnews@bh.com.my

■ Kuantan

Universiti Malaysia Pahang (UMP) melalui anak syarikatnya, UMP Advanced bakal menawarkan program ijazah sarjana muda sepenuh masa kemasukan khas bagi pengambilan Februari 2018.

Ketua Pegawai Eksekutif UMP Advanced, Dr Mohamad Rozi Hassan, berkata ia bertujuan memberi peluang kepada lepasan diploma atau setaraf yang baru tamat pengajian, menyambung terus ke peringkat ijazah sarjana muda UMP.

Beliau berkata, kumpulan sasaran kemasukan khas itu adalah lepasan diploma atau setaraf daripada universiti awam atau swasta, politeknik, institusi latihan kemahiran dan institusi pendidikan MARA.

"Sebanyak 23 program pengajian

ditawarkan bagi kemasukan khas ini seperti bidang kejuruteraan, teknologi kejuruteraan, sains komputer, sains gunaan dan penguasaan teknologi.

"Kami yakin pengambilan kemasukan khas ini dapat meningkatkan jumlah pelajar dalam bidang Latihan Pendidikan Teknikal dan Vokasional (TVET) peringkat tinggi seterusnya menjadi peneraju untuk lepasan TVET melanjutkan pelajaran ke peringkat lebih tinggi," katanya.

Katanya, program selama lapan semester atau empat tahun itu boleh dipendekkan, tertakluk kepada pengecualian kredit program yang diperolehi dengan UMP menyasarkan 360 pelajar baharu bagi kemasukan khas yang dikhususkan untuk program ijazah sarjana muda.

"Pelajar berminat perlu memenuhi syarat minimum ditetapkan UMP dan memperoleh Tahap 2 dalam Malaysian University English Test (MUET). Permohonan boleh dibuat

dalam talian melalui laman web rasmi UMP Advanced, umpadvanced.ump.edu.my sebelum tarikh tutup 15 Disember ini," katanya.

Sementara itu, katanya, UMP Advanced sentiasa peka dengan kehendak industri dan menyokong agenda Pelan Strategik UMP 2016-2020 melalui Lonjakan Strategi 1: Keunggulan Akademik melalui kebolehpasaran graduan.

"Antara inisiatif diperkenalkan bagi kemasukan khas ini adalah dengan memberi nilai tambah kepada pelajar melalui program sijil profesional.

"Ia bermakna, disamping memperoleh ijazah sarjana muda dalam bidang masing-masing apabila keluar nanti, mereka juga mendapat tambahan sijil profesional yang relevan dengan keperluan semasa industri.

"Cara ini akan memudahkan para graduan untuk mendapat kerja," katanya.



Sebanyak 23 program pengajian ditawarkan bagi kemasukan khas ini seperti bidang kejuruteraan, teknologi kejuruteraan, sains komputer, sains gunaan dan penguasaan teknologi"

Mohamad Rozi Hassan,
Ketua Pegawai Eksekutif
UMP Advanced